

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

1. प्रधानमंत्री नरेन्द्र मोदी होरें आक्खेआ ऐ जे श्रीनगर च डल झील दे कंडे पर फारमूला-4 कार शो नै जम्मू कश्मीर दी खूबसूरती गी लोकें गी दस्सने च होर मदाद कीती ऐ।
2. चुनां आयोग आस्सेआ लोकसभा चुनाएं दे कार्यक्रम दा ऐलान करने परेंत बक्ख-बक्ख सियासी पार्टियां जोरे-शोरें रैलियां करै करदियां न।
3. भारती चुनां आयोग नै जम्मू कश्मीर दी पैरा-तीरंदाज ते अर्जुन अवार्ड विजेता शीतल देवी होरें गी पीडब्ल्यूडी श्रेणी दी अपनी राश्ट्री आईकन घोषत कीता ऐ।
4. डीजीपी आर.आर.स्वैन होरें आक्खेआ ऐ जे लोकसभा चुनाएं दरान जम्मू कश्मीर पुलस सब्बनें गी लोडचदी सुरक्षा ते साजगार माहौल उपलब्ध करोआग।
5. उपराज्यपाल मनोज सिन्हा होरें आक्खेआ ऐ जे महिला उद्यमी जम्मू कश्मीर दे भविक्ख गी नमां आकार देआ करदे न।

<><><><><><>

## PM-J&K

प्रधानमंत्री नरेन्द्र मोदी होरें आक्खेआ जे श्रीनगर दी डल झील कश पैहले-पैहले फारमूला-4 कार शो दा सरिस्ता कीता गेआ। एहदे कन्नै जम्मू कश्मीर दी सुदरता गी दिक्खने ते इत्थुआं दे छलैपे गी दिक्खने दा मौका थहोग। इक सोशल मीडिया पोस्ट च मोदी होरें आक्खेआ जे मोटर स्पोर्टस खेड्डें आस्तै भारत च केई मौके न ते श्रीनगर सारे थमां उप्पर ऐ।

<><><><><><>

## Polls Process

भारतीय चुनाव आयोग आस्सेआ चुनाव कार्यक्रम दी घोषणा दे बाद थमां गै मुख्य च चुनाव प्रक्रिया शुरू होई चुकी दी ऐ जे सियासी पार्टिएं रैलिएं दा आयोजन शुरू करी दित्ते दा ऐ। प्रधानमंत्री नरेन्द्र मोदी होरें कल आंध्रप्रदेश दे पालनाडू च एनडीए दी चुनाव रैली गी संबोधत कीता। उनें आक्खेआ जे एनडीए गठबंधन क्षेत्रीय आसें तांगें ते राष्ट्रीय विकास गी लेइयै अगड़े बधै करदा ऐ ते एहदा मकसद विकसित भारत लेई विकसित आंध्रप्रदेश बनाना ऐ। उनें आक्खेआ जे आंध्रप्रदेश च बीजेपी दी डबल इंज नदी सरकार औने कन्नै इत्थें होर बी विकास होग। उनें आक्खेआ जे सरकार करसानें दिऐं निक्की-निक्की जरूरतें पर बी ध्यान देआ'रदी ऐ ते प्रधानमंत्री किसान सम्मान निधि योजना तैहत इस क्षेत्र दे करसानें गी 700 करोड़ रपे कोला मती रकम उपलब्ध कराई जाई चुकी दी ऐ। मोदी होरें कांग्रेस दी नुख्ताचीनी करदे होई आक्खेआ जे एनडीए दी सरकार अपने वायदें गी नभाग ते प्रदेश दा सम्मान बनाई रक्खोग।

<><><><><><>

Dr. Jatinder Singh

केन्द्री मंत्री डॉ. जितेन्द्र सिंह जेहड़े उधमपुर संसदीय हल्के लेई बीजेपी दे मेदवार बी हैन, होरें आक्खेआ ऐ जे किश संवैधानिक ते प्रशासनिक रूकावटें करी जम्मू कश्मीर च सेहत खेत्तर मेदें मूजब विकसित नेई होई सकेया। जम्मू च बीजेपी आस्सेआ आयोजित डाक्टर्स सम्मेलन गी संबोधत करदे होई डॉ. सिंह होरें पैहलकी सरकारें पर दोष लाया जे उनें जम्मू कश्मीर च बेहतर सेहत सहूलतें बक्खी कोई ध्यान नेई दित्ता जिस करी 7 दहाकें तगर प्रदेश दे लोक किफायती ते म्यारी सेहत सहूलतें शा वंचित रेह। उनें आक्खेआ जे 2014 च नरेन्द्र मोदी हुंदे प्रधानमंत्री बनने दे बाद हालात बदले ते फही 2019 च उनें सब्बनें संवैधानिक रूकावटें गी हटाई दित्ता।

<><><><><><>

Azad

साबका मुखमंत्री ते डैमोक्रेटिक प्रोग्रेसिव अजाद पार्टी दे चेयरमैन गुलाम नबी आजाद होरें चुनाव आयोग गी आग्रह कीता जे ओह जम्मू कश्मीर च विधानसभा चुनाव लोकसभा चुनाव मुक्कने दे इक म्हीने दे अंदर-अंदर करोआई दे। उनें गलाया जे 5 पार्लिमानी हल्के च जेकर 10 मेदवार हर हल्के थमां चुनाव मैदान च न तां कुल मेदवारें दी गिनतरी 50 होई जंदी ऐ ते इनें 50 मेदवारें गी सुरक्षा देनी होग। इस्सै चाल्ली हर 90 विधानसभा हल्के थमां 15 मेदवार चुनाव लड़दे न तां कुल 15 सौ मेदवार होंगन ते उनेंगी सुरक्षा कन्नो कन्नी देना मुश्कल ऐ। उनें चुनाव आयोग गी आग्रह कीता जे ओह लोकसभा चुनाव दी प्रक्रिया पूरी होने मगरा इक म्हीने दे अंदर विधानसभा चुनाव दी प्रक्रिया गी शुरू करोआ। आजाद होर इक राष्ट्र इक चुनाव आले बचार दी संभावनाएं दा पता लाने लेई साबका राष्ट्रपति रामनाथ कोविंद हुंदी अध्यक्षता च कायम उच्च स्तरी कमेटी दे मिंबर बी ऐ हे।

<><><><><><><><>

Rahul Gandhi

कांग्रेस नेता राहुल गांधी होरें मुंबई च कल डॉ. बी.आर.अंबेडकी हुंदे स्मारक स्थल चैत्यभूमि जाइयै उत्थें श्रद्धांजलि अर्पित कीती ते संविधान दी प्रस्तावना पढ़ियै 63 दिनें तगर चली दी अपनी भारत जोड़ो न्यां यात्रा खत्म करी दित्ती। उनें आक्खेआ जे उंदी भारत जोड़ो न्यां यात्रा दा मकसद ओकडे मुद्दें जियां बेरोजगारी, हिंसा, मेंहगाई, करसानें ते अग्निवीरें दे मामलें गी पुट्टना हा जिंदी मीडिया आस्सेआ अनदिक्खी कीती जा'रदी ऐ। राहुल गांधी होर मुंबई दे शिवाजी पार्क च INDI गठबंधन दी चुनावी रैली गी संबोधत करै करदे हे। पीडीपी नेता महबूबा मुफ्ती बी इस रैली च शामिल होइयां।

<><><><><><><><>

ECI Sheetal Devi

जम्मू कश्मीर लेई एह मानै आली गल्ल ऐ जे चुनां आयोग नै पैरा तीरंदाज ते अर्जुन अवार्ड विजेता शीतल देवी होरें गी पीडब्ल्यूडी श्रेणी च अपना राष्ट्रीय आइकन घोशत कीता ऐ। उंदे नां दी घोषणा दिल्ली च होए दे इक प्रदर्शनी क्रिकेट मैच दरान कीती गई। इस मौके पर चुनां आयोग नै दिव्यांग ते बुर्जुग मतदाताएं लेई इक समर्पित मतदाता गाइड जारी कीती, जेहदे च दिव्यांग ते वरिष्ठ मतदाताएं लेई उपलब्ध जरूरी प्रावधानें दी जानकारी दित्ती गेदी ऐ। शीतल देवी पैरा तीरंदाज खडारी न ते ओह किशतवाड़ जिले दे दूर दरेड़े इलाके दियां बसनीक न। तोआई चुनां आयोग नै सुप्रीम कोर्ट दी रजिस्ट्री थमां हासल डिजिटल डेटा अपनी वैबसाइट पर अपलोड करी दित्ता ऐ। एहदे बारे जानकारी आयोग दी वैबसाइट थमां हासल होई सकदी ऐ। चुनां आयोग नै आक्खेआ जे सियासी पार्टिं चुनावी बांउे सरबंधी डेआ सीलबंद लफाफे च दित्ता ते लफाफें गी खोले बिजन इसी सुप्रीम कोर्ट दे हवाले करी दित्ता गेआ हा। अदालतै दे 15 मार्च दे निर्देश मूजब सुप्रीम कोर्ट दी रजिस्ट्री नै एह डेटा सील कवर च फिजिकल माध्यम यानि दस्ती हार्ड कॉपी ते पैन ड्राइव च चुनां आयोग गी वापस करी दित्ता ऐ।

<><><><><><><><>

LS-DGP

जम्मू कश्मीर पुलस दे डरैक्टर जनरल आर.आर.स्वैन होरें केन्द्र शासत प्रदेश च औंदे लोकसभा दे चुनावं गी पूरी चाल्ली सुरखत ते रमानदारी आले ढंगै सिर तोड़ चाढ़ने दा भरोसा जताया ऐ। उनें जोर देइयै आक्खेआ जे जम्मू कश्मीर पुलसै समूलचे केन्द्र शासत प्रदेश चा आतंकवाद दा समूलचा सफाया करने दा पक्का धेइया कीते दा ऐ। उनें आक्खेआ जे आतंकवादिं दी मदाद करने आलें खलाफ सख्त कारवाई कीती जाग। डीजीपी

होर डोडा जिले च इक जनता दरबार दे बक्ख-बाहरें मीडिया कन्नै गल्लबात करे करदे हे। एहदे शा पैहले खरी मती गिनतरी च लोक इस जनता दरबार च आए ते पुलस दिएं बक्ख-बक्ख सेवाएं जियां जांच, शकैतें ते बकाया पेदे तसदीक दे कम्मं कन्नै सरबंधत अपने मामलें दे नबेड़े दी मंग कीती। डीजीपी होरें आक्खेआ जे इक कैप दा मकसद पुलस कर्मिं दे परोआरें खास करियै आतंकवाद खलाफ लड़ाई च जिंदु दा बलिदान देने आले एसपीआएं दे परोआरें दिएं समस्याएं गी सुनना ते उंदा नबेड़ा करोआना बी ऐ हा।

<><><><><><>

## LG-Women

उपराज्यपाल मनोज सिन्हा होरें आक्खेआ जे महिला उद्यमी जम्मू कश्मीर दे भविक्ख गी आकार देआ'रदियां न। उनें आक्खेआ जे आईटीईएस भलेयां लौहके, लौहके ते दरमेयाने दर्जे दे उद्योगें, सेवा सेक्टर, राई-बाई आधारित उद्योग च महिला खरी ते टकोहदी कारकरदगी दस्सा'रदियां न। एह गल्ल उपराज्यपाल होरें ईटी-वूमैन कनक्लेव 2024 आक्खी। इसदा सरिस्ता द टाईम्स ग्रुप आस्सेआ कीता गेआ। उपराज्यपाल होरें नारी शक्ति गी नमन कीता ते नमें जम्मू कश्मीर दी यात्रा च महिलाएं दे महत्वै आले योगदान दी सराहना कीती। उनें केन्द्र शासत प्रदेश दे प्रशासन आस्सेआ महिलाएं दे समाजिक-आर्थिक सशक्तिकरण लेई साजगार माहौल कायम करने दी वचनबद्धता गी दोहराया। उपराज्यपाल होरें यूनिवर्सिटिएं ते उच्च शिक्षा इदारे आस्सेआ हुनर सरबंधी सिखलाई ते हुनर गी होर बेहतर बनाने लेई चलाए जा'रदे प्रोग्रामें गी बी उजागर कीता।

<><><><><><>

## Start Up

स्टार्ट अप महाकुंभ अज्जै थमां नमीं दिल्ली दे भारत मंडपम च शुरू होग। एह कार्यक्रम 20 मार्च तगर चलोग। इस आयोजन च बक्ख-बक्ख स्टार्टअप्स दे बक्खरे-बक्खरे पैविलियन होंगन जिंदे च आर्टिफिशल इंटैलीजेंस, बी2बी, एग्रीटेक, डीपटेक, क्लाइमेंट-टैक, गेमिंग, ई-स्पोर्टस ते फिटटैक जनेह नेकां खास पैविलियन शामिल होंगन। इस महाकुंभ दा मकसद पूंजीपतिएं ते निवेशकें गी भारती बपार कन्नै जोड़ना ऐ। कल नमीं दिल्ली च संवाददाता सम्मेलन च बोलदे होई डीपीआईआईटी दे सचिव राजेश कुमार सिंह होरें आक्खेआ जे भारत त्रिया सब्बनें शा बड्डा स्टार्टअप तंत्र आला मुख्य ऐ ते नमें स्टार्टअप्स दी इस सूचि च हर रोज मती गिनतरी च बाद्धा होआ'रदा ऐ।

<><><><><><>

## Ullas-Samba

नमीं शिक्षा नीति दे तैहत भारत सरकारै 2022–2027 दी अवधि लेई नव भारत साक्षरता कार्यक्रम उल्लस गी रम्मेया ऐ। एह योजना 15एं बरें यां ओहदे शा मते दी उम्री दे जेहडे लोक साक्षर नेई हैन, उंदे पर केंद्रित होग। एहदा मकसद सब्बनें लेई शिक्षा ते सब्बनें गी साक्षर लेई शिक्षा ते सब्बनें गी साक्षर बनाना ऐ। इस्सै आधार पर समग्र शिक्षा जम्मू–कश्मीर आस्सेआ अज्ज समूलचे प्रदेश च केंद्र शासित प्रदेश स्तर दे आंकलन परीक्षा दा आयोजन कीता गेआ। जम्मू संभाग दे सांबा जिले च बी एह म्तेहान करोआया गेआ जित्थे 383 उल्लास केंद्र खडेरे गेदे हे।

<><><><><><>